

De huweliksreis

Jan en An hadde van eur letste geld wat ônduudelikke muibelkes gekoch zoëdet d'r genne roeije miër euver waas veur ein huweliksreis. Maar gezeen 't feit det eine mins in daen tièd maar eine kiër in zien laeve op huweliksreis ging, verkoch Jan zien dafje. Det waas d'r nog eine met zôn huif achterop en ein degelikke planke vloer d'r in. Met de opbrings van det dafje stapde hae 't station binne wao hae ôntvange woort door ein maedje met ein rônd gezich wao de cosmetische industrie flink op hoèsgehalde had.

Jan leet zich gaer advisere want hae waas noeits vaerder gewaes as ons buiten en klein zwitserland.

Hae vroeg veur moei waer, ein wit strand, en boekde ein achdaagse reis nao de franse côte d'azuur

Um precies te zien nao Juan les Pins. Doordet hae amper op d'n harde waeg waas gewaes wis daen ermen blood neet det ein van de deurste badplaatse van frankrièk is, maar dao kwame waal achter.

Ze hadde ein hotelletje met allein ochtend ôntbeit, want zeej dôchte, asse s'morges met ein stevig ônbeit begins, kinse de res van d'n daag waal van de leefde laeve. Maar lauw loene, ze kregen s'morges ein ozelig stökske stekbroëd met marmelade, niks eier met spek bloodwors of zoë iets.

In tièd van ein sneej mik hadde zeej zôn bietje ermood wies ônder de erm , zoge d'n baom van de knip al in zich kômme en meuste vaerder laeve van stekbroëd en mineraalwater.

Nao d'n iersten daag op ein terras met eine gas tuutjes beer, hadde ze namelijk 't zelfde tempo aangehalde wie ze det op de Parade gewind ware.

Eur hotelkamer had twee einpersoëns bedde met ein gammel nachkesje d'r tössenin en ein behang waosse kaelpien van kreegs. Wie Jan hiel romantisch det nachkesje tösse die bedde oèt woel haole haette dao nog duchtig aan môtte trekke want det geval zoot zoëwat aan de vloer vasgegreujd.

Maar, de zôn en det witte strand makde vuul good, zeej trokke eur veur de côte d'azuur antieke badpakke aan, en zônnebaaje maar want ze meuste good broen thoès de straot in kômme. Noow ware ze allebei melkflessewit en hadde nog noeits van zônnebrand aolie factor weit ik wiewuul gehuurd. Zeej braojde en braojde wie ein paar halve hane aan 't spit en asse de zieë indoke begôs 't water zoëwat te broèze. In einen daag Juan les Pins ware zeej door eur pieke haer, van top wies tiën verbrand en zoë roëd wie ein kraef, alles deej pien met 't gevolg det ze de res van de huweliksreis nog neet nao elkaar kôste wièze, laot staon aanrake.

Erg hè

Wiel Hermans Venlo